

Na osnovu člana 7. Zakona o budžetima u Federaciji Bosne i Hercegovine („Službene novine Federacije Bosne i Hercegovine“, broj: 102/13, 9/14, 13/14, 8/15, 91/15, 102/15, 104/16, 5/18, 11/19, 99/19, 25a/22 i 7/25), člana 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj: 49/06 i 51/09) i člana 25. Statuta Grada Tuzla („Službeni glasnik Grada Tuzla“, broj: 6/21 i 4/25), Gradsko vijeće Grada Tuzla, na sjednici održanoj dana 19.12.2025. godine, d o n o s i:

O D L U K U

o izvršavanju Budžeta Grada Tuzle za 2026. godinu

I – OPŠTE ODREDBE

Član 1. (Predmet)

Ovom Odlukom uređuje se struktura prihoda i primitaka, rashoda i izdataka Budžeta Grada Tuzle za 2026. godinu (u daljem tekstu: Budžet), njegovo izvršavanje, prioriteti plaćanja, obim zaduživanja i garancije, upravljanje javnim dugom, prava i obaveze korisnika budžetskih sredstava, ovlaštenja Gradonačelnika, gradskih službi za upravu, gradskih stručnih i drugih službi, gradskih upravnih organizacija i Gradskog pravobranilaštva, kao i druga pitanja o izvršavanju Budžeta za tekuću godinu.

Član 2. (Pojam)

Budžet je procjena godišnjih prihoda i primitaka, te utvrđenih iznosa izdataka i drugih plaćanja Grada, koji donosi Gradsko vijeće.

Budžet se odnosi na fiskalnu 2026. godinu, koja počinje 01. januara, a završava 31. decembra 2026. godine.

Član 3. (Struktura budžeta)

Budžet se sastoji od općeg, posebnog dijela i pregleda kapitalnih ulaganja.

Opći dio budžeta čini Račun prihoda i rashoda, Račun kapitalnih primitaka i izdataka i Račun finansiranja na nivou ukupnog budžeta.

Posebni dio budžeta sastoji se od plana rashoda i izdataka budžetskih korisnika, iskazanih po ekonomskoj, funkcionalnoj i organizacionoj klasifikaciji.

Pregled kapitalnih ulaganja prikazuje ukupnu vrijednost ulaganja po projektima i izvorima finansiranja.

Član 4. (Budžetski korisnici)

Budžetski korisnici su Grad Tuzla, JU Centar za socijalni rad Tuzla, JU Centar za kulturu Tuzla i JU Tuzlanska razvoja agencija "TRAG" Tuzla - Development Agency "TRAG" Tuzla.

Član 5.
(Evidencije)

Transakcije svih prihoda, primitika, rashoda i izdataka, odnosno sve poslovne aktivnosti iz budžeta evidentiraju se u Glavnoj i Pomoćnim knjigama trezora.

Član 6.
(Uplata prihoda)

Svi javni prihodi i primici budžeta, uključujući i prihode koje korisnici budžeta ostvaruju obavljanjem osnovne djelatnosti po posebnim propisima, uplaćuju se na depozitni račun Grada Tuzle i iskazuju po izvorima iz kojih potiču.

Prihodi ostvareni po osnovu Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, br. 29/03, 22/06 i 43/10) evidentiraju se na posebnom transakcijskom računu koji je u sastavu JRT i koriste se u skladu sa Odlukom o uslovima i načinu korištenja sredstava po osnovu posebne naknade za zaštitu od prirodnih i drugih nesreća („Službene novine Federacije BiH“, br. 4/12, 80/13 i 20/20).

Prihodi ostvareni po osnovu naknade za izgradnju skloništa u skladu sa Zakonom o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“ br. 39/03, 22/06 i 43/10), evidentiraju se na posebnom transakcijskom računu JRT i koriste se za izgradnju i održavanje javnih skloništa, u skladu sa dugoročnim programima i godišnjim planovima za izradu javnih skloništa.

Prihodi ostvareni po osnovu Zakona o zaštiti od požara i vatrogastvu („Službene novine Federacije BiH“ br. 64/09 i 77/25), evidentiraju se na posebnom transakcijskom računu JRT i koriste se u okviru Službe civilne zaštite za potrebe Profesionalne vatrogasne jedinice Tuzla.

Prihodi ostvareni na osnovu Zakona o izdvajanju i usmjeravanju dijela prihoda preduzeća ostvarenih radom termoelektrana („Službene novine FBiH“, broj: 80/14 i 19/25), evidentiraju se na posebnom transakcijskom računu i koriste u skladu sa članom 6. citiranog Zakona.

Prihodi ostvareni po osnovu Zakona o cestama Federacije Bosne i Hercegovine („Službene novine FBiH“, broj: 12/10, 16/10 i isp.66/13) evidentiraju se na posebnom transakcijskom računu koji je u sastavu JRT i koriste se u skladu sa članom 88. navedenog Zakona, a u okviru sredstava utvrđenih budžetom.

II - IZVRŠAVANJE BUDŽETA

Član 7.
(Sredstva za budžetske korisnike)

Sredstva budžeta koriste se za finansiranje rashoda i izdataka iz nadležnosti gradskih službi za upravu, stručnih službi, upravnih organizacija, javnih ustanova i ostalih čije je finansiranje iz budžeta predviđeno posebnim propisom.

Sredstva budžeta osiguravaju se budžetskim korisnicima, odnosno potrošačkim jedinicama u okviru budžetskog korisnika, koji su u posebnom dijelu budžeta određeni za nosioce sredstava na pojedinim pozicijama.

Korisnici koriste budžetska sredstva samo za namjene koje su određene budžetom, i to do visine utvrđene u njegovom posebnom dijelu.

Član 8.
(Neplanirana namjenska sredstva budžetskih korisnika)

Donacije i namjenski transferi odobreni i uplaćeni na depozitni račun Grada Tuzla, a koji nisu planirani u Budžetu Grada Tuzle, usmjeravaju se u budžet za fiskalnu godinu na osnovu Odluke Gradonačelnika, na prijedlog Službe za budžet i finansije, a u skladu sa zahtjevom nadležnog budžetskog korisnika za namjene za koje su i uplaćeni.

Član 9.
(Odgovornost za prikupljanje prihoda)

Budžetski korisnici odgovorni su za potpuno i pravovremeno prikupljanje i uplaćivanje na depozitni račun Grada Tuzla prihoda budžeta, namjenskih sredstava i vlastitih prihoda iz svoje nadležnosti.

Budžetski korisnici odgovorni su za zakonitost, svrsishodnost, efikasnost i ekonomičnost raspolaganja budžetskim sredstvima.

Član 10.
(Operativni budžeti)

Budžet se izvršava na temelju tromjesečnih planova raspoloživih budžetskih sredstava (novčanog toka), koji odobrava Odbor za likvidnost, na prijedlog Službe za budžet i finansije, a na osnovu dinamike priliva sredstva u budžetu.

Budžetski korisnici pripremaju i podnose prijedloge operativnih budžeta Službi za budžet i finansije.

Prijedlozi operativnih budžeta obuhvataju rashode za tri mjeseca, iskazane na mjesečnom nivou.

Služba za budžet i finansije izvještava korisnike o odobrenim operativnim budžetima.

Rashodi svakog korisnika ne mogu prelaziti iznose budžetskih sredstava utvrđenih u operativnom budžetu.

Član 11.
(Prioriteti izvršavanja budžeta)

Budžet se izvršava u skladu sa njegovim likvidnim mogućnostima po slijedećim prioritetima:

1. otplata duga i kamata,
2. plaće i naknade zaposlenih,
3. transferi i za jednokratne pomoći u oblasti socijalne i boračko invalidske zaštite,
4. plaćanje obaveza po sudskim presudama
5. materijalni i drugi troškovi neophodni za rad gradskih službi za upravu,
6. naknade za rad u Gradskom vijeću i radnim tijelima Gradskog vijeća,
7. tekući izdaci za komunalnu infrastrukturu,
8. kapitalni izdaci za komunalnu infrastrukturu i
9. ostalo.

Član 12.
(Javne nabavke)

Postupak nabavke roba, usluga i ustupanja radova mora se obavljati u skladu sa Zakonom o javnim nabavkama BiH („Službeni glasnik BiH“, broj: 39/14, 59/22 i 50/24), Planom javnih nabavki, odredbama važećeg Pravilnika i drugim propisima koji regulišu ovu oblast.

Član 13.
(Tekuća rezerva)

Hitni i nepredviđeni izdaci koji se pojave u toku budžetske godine, podmiruju se iz sredstava Tekuće rezerve utvrđene u budžetu.

O korištenju sredstava Tekuće rezerve, odlučuje Gradonačelnik, na prijedlog nadležne službe.

Budžetsko izdvajanje za Tekuću rezervu ne smije preći 3% ukupnih prihoda, bez namjenskih prihoda, vlastitih prihoda i bez primitaka.

Ako se tokom godine, na osnovu zakona ili drugih propisa poveća nadležnost korisnika, što zahtijeva povećana sredstva, ili se osnuje novi korisnik, sredstva za njegove troškove mogu se osigurati iz Tekuće rezerve budžeta, a odobrava ih Gradonačelnik.

Ako se tokom godine, na osnovu zakona ili drugih propisa umanja nadležnost korisnika, što zahtijeva smanjena sredstva, ili se korisnik ukine, neutrošena sredstva za njegove troškove prenose se u Tekuću rezervu budžeta ili na korisnika koji preuzme njegove poslove.

Služba za budžet i finansije obavezna je tromjesečno izvještavati Gradonačelnika o korištenju sredstava Tekuće rezerve.

Gradonačelnik polugodišnje izvještava Gradsko vijeće o korištenju sredstava Tekuće rezerve.

Član 14.
(Preraspodjela sredstva)

Gradonačelnik može na prijedlog budžetskog korisnika, odnosno potrošačke jedinice budžetskog korisnika, donijeti odluku o prestrukturiranju rashoda u okviru ukupnog iznosa odobrenog za budžetskog korisnika, a najviše do 10% ukupno odobrenih rashoda za budžetskog korisnika.

U okviru odobrenog budžeta, preraspodjela sredstava iznimno je dozvoljena između budžetskih korisnika kao i potrošačkih jedinica budžetskog korisnika.

O preraspodjeli iz prethodnog stava odlučuje Gradonačelnik na prijedlog Službe za budžet i finansije, a u skladu sa zahtjevom budžetskog korisnika, odnosno potrošačke jedinice budžetskog korisnika.

Uz zahtjev za preraspodjelu, budžetski korisnici, odnosno potrošačke jedinice moraju priložiti odgovarajuću dokumentaciju kojom se Službi za budžet i finansije daju na uvid razlozi za obezbjeđivanje dodatnih sredstava na budžetskoj poziciji, odnosno razlozi za smanjenje određenih budžetskih pozicija.

Član 15.
(Jedinstveni račun trezora)

Obavljanje platnih transakcija vrši se preko transakcijskih računa koji su sastavni dio jedinstvenog računa trezora (u daljem tekstu: „JRT“).

JRT može imati više podračuna.

Sa JRT se ne može isplatiti nijedan izdatak ukoliko nije odobren Budžetom.

Član 16.
(Povrat više ili pogrešno uplaćenih prihoda)

Povrat pogrešno ili više uplaćenih javnih prihoda u tekućoj godini vrši se sa računa javnih prihoda (depozitnog računa) iz tekućeg priliva korisnika prihoda, a povrat prihoda koji nisu uplaćeni u tekućoj godini vrši se sa transakcijskih računa korisnika prihoda, u skladu sa odredbama važećeg Pravilnika.

III - REALIZACIJA SREDSTAVA BUDŽETA

Član 17.
(Sredstva za rad Gradskog vijeća Tuzla)

Sredstva utvrđena za isplatu naknada za rad u Gradskom vijeću i u radnim tijelima Gradskog vijeća isplaćuju se na osnovu Odluke o naknadama vijećnicima i članovima radnih tijela Općinskog vijeća („Službeni glasnik općine Tuzla“, br. 6/97, 10/02 i 12/06, 1/08, 1/09 i 11/10), Odluke o naknadama predsjedavajućem, zamjeniku predsjedavajućeg, predsjednicima Klubova, nezavisnim i vijećnicima iz reda nacionalnih manjina-članovima Kolegija Gradskog vijeća Tuzla („Službeni glasnik općine Tuzla“, broj 8/07 i Službeni glasnik Grada Tuzla“, broj 7/17) i drugim propisima koji regulišu ovu oblast.

Raspodjela sredstava za rad parlamentarnim političkim subjektima u Gradskom vijeću Tuzla vrši se u skladu sa Odlukom o izdvajanju sredstava iz Budžeta Grada Tuzla za rad političkih stranaka, nezavisnih vijećnika, koalicija i lista nezavisnih kandidata („Službeni glasnik Grada Tuzla“, broj 1/02, 12/06, 8/07, 11/11, 2/13, 3/13 i 12/17).

Član 18.
(Sredstva za rad Savjeta mjesnih zajednica)

Sredstva planirana za rad Savjeta mjesnih zajednica isplaćuju se na osnovu Odluke o visini naknade predsjednicima i članovima Savjeta mjesnih zajednica („Službeni glasnik Općine Tuzla“, broj: 06/10 i 09/13).

Član 19.
(Plaće i naknade troškova zaposlenih)

Sredstva utvrđena u Budžetu za plaće uposlenika, isplaćuju se u skladu sa važećom Odlukom o plaćama uposlenika gradskih organa Tuzla.

Osnovica za obračun plaće uposlenika gradskih organa Tuzla u periodu 01.01.-31.12.2026. godine, iznosi 480,00 KM, a visina boda 1,15, što je utvrđeno potpisanim Sporazumom o utvrđivanju osnovice i boda za obračun plaće za 2026. godinu između Gradonačelnika Grada Tuzle, Sindikalne organizacije državnih službenika i namještenika Grada Tuzle i Sindikalne organizacije Profesionalne vatrogasne brigade (PVB) Tuzla.

Sredstva za naknade zaposlenih isplaćuju se u skladu sa važećom Odlukom o naknadama uposlenicima gradskih organa uprave Tuzla koje nemaju karakter plaće.

Sredstva za plaće i naknade uposlenih u javnim ustanovama, iz člana 4. ove Odluke, obračunavat će se i isplaćivati u skladu sa važećim pravilnicima javnih ustanova.

Član 20.
(Raspoređivanje sredstava)

Sredstva utvrđena u Budžetu Grada Tuzle na pozicijama:

1. Transferi pojedincima-socijalne jednokratne pomoći,
2. Transferi pojedincima – za liječenje teško oboljelih u inostranstvu,
3. Transferi pojedincima-jednokratne pomoći korisnicima BIZ-a,
4. Ostali transferi za obavezno zdravstveno osiguranje za lica u stanju socijalne potrebe i
5. Transferi za rad sportskih društava i klubova

raspoređuju se na osnovu pravilnika ili odluka koje donosi Gradsko vijeće.

Član 21.

Sredstva utvrđena u Budžetu Grada Tuzle na pozicijama :

1. Nagrade studentima, učenicima i sportistima za natprosječan uspjeh,
2. Transferi organizacijama iz oblasti poljoprivredne proizvodnje,
3. Transferi neprofitnim organizacijama – sport
4. Transferi neprofitnim organizacijama - udruženja, organizacije i fondacije,
5. Transferi neprofitnim organizacijama – nacionalna i kulturno nacionalna udruženja,
6. Transferi neprofitnim organizacijama – DVD na području grada Tuzla,
7. Transferi neprofitnim organizacijama - podrška radu udruženjima,
8. Transferi za zaštitu kulturno - historijskog i prirodnog naslijeđa,
9. Transferi za ostale nacionalne manjine,
10. Transferi za realizaciju Akcionog plana za Rome i Romkinje grada Tuzle,
11. Transferi za realizaciju kulturne manifestacije „Ljeto u Tuzli“,
12. Transferi za projekte za mlade,
13. Transferi za medije,
14. Tekući transferi vjerskim zajednicama
15. Tekući transferi za finansiranje projekata iz oblasti poduzetništva,
16. Subvencioniranje kamata za stambeno zbrinjavanje mladih,
17. Transfer za rad neprofitnim organizacijama iz oblasti poduzetništva,
18. Kapitalni transferi za razvoj primarne poljoprivredne proizvodnje,
19. Tekući transfer neprofitnim organizacijama iz oblasti zaštite i spašavanja na području grada Tuzle,
20. Transferi za kulturne manifestacije,
21. Transferi za sportske manifestacije,
22. Tekući transfer za mobilnost mladih,
23. Transfer za rad organizacija i udruženja iz oblasti BIZ-a

raspoređuju se na osnovu programa o načinu raspodjele, namjeni sredstava i utrošku istih za svaku poziciju u ovom članu, donesenih od strane Pomoćnika Gradonačelnika za nadležnu službu u skladu sa kriterijima utvrđenim u odlukama i pravilnicima koje donosi Gradonačelnik.

Navedena sredstva će se dodjeljivati u skladu sa Smjernicama o minimalnim standardima dodjele budžetskih sredstava putem transfera i subvencija Bosne i Hercegovina („Sl. novine Federacije BiH“ br. 37/24)

Program raspodjele sredstava za pozicije iz stava 1. ovog člana sadrži slijedeće elemente:

- naziv projekta,
 - ime korisnika projekta,
 - visinu sredstava za realizaciju projekta,
 - broj transakcijskog računa korisnika projekta,
- osim za pozicije: „Nagrade studentima, učenicima i sportistima za natprosječan uspjeh“ i „Tekući transfer za mobilnost mladih“ za koje program raspodjele sredstava treba da sadrži sljedeće elemente:
- ime i prezime korisnika sredstava,
 - visinu sredstava za dodjelu i
 - broj transakcijskog računa korisnika sredstava.

Rok za usvajanje programa raspodjele sredstava iz stava 1. ovog člana je 30.09.2026. godine.

Resorne službe su dužne, nakon okončanja procedure raspodjele sredstava, zaključiti ugovore sa korisnicima o načinu korištenja sredstava, te pratiti njihovu realizaciju, osim na poziciji „Nagrade učenicima, studentima i sportistima za natprosječan uspjeh“.

Član 22.

Sredstva utvrđena u Budžetu Grada Tuzle na pozicijama :

1. Transfer za rad - JP „RTV 7“ Tuzla,
2. Transfer za rad – JP SKPC „Mejdan“ Tuzla,
3. Transfer za rad – JP Gradska veterinarska stanica Tuzla,
4. Transfer za rad – RPC Tuzla – „Inkubator Lipnica“,
5. Tekući transfer – JZU Gradske apoteke Tuzla,
6. Tekući transfer za JU „Dom penzionera“ Tuzla
7. Kapitalni transfer za JU „Dom penzionera“ Tuzla
8. Tekući transfer za JZNU Dom zdravlja „Dr. Mustafa Šehović“ Tuzla
9. Transfer za tekuće poslovanje DOO „Tržnice - Pijace“ Tuzla,
10. Transfer za realizaciju Plana upravljanja otpadom za Grad Tuzla,
11. Transfer JKP „Vodovod i kanalizacija“ d.o.o. Tuzla,
12. Transfer za rad –JU za predškolski odgoj i obrazovanje „Naše dijete“ Tuzla,
13. Kapitalni transfer - JU Obdanište “Naše dijete” Tuzla,
14. Transfer za rad – JU „Gradski stadion Tušanj“ Tuzla,
15. Transfer neprofitnoj organizaciji Sportski savez grada Tuzla,
16. Transfer za rad – za Vijeće mladih,
17. Transfer za rad Sigurne kuće – UG „Vive žene“ Tuzla
18. Transfer za rad – Crveni križ grada Tuzle,
19. Kapitalni transfer – Memorijalni centar Srebrenica – Potočari, Spomen obilježje i mezarje za žrtve genocida iz 1995. godine,
20. Transfer neprofitnoj organizaciji- UG “Kuća plamena mira“ Tuzla,
21. Transfer za MDD „Merhamet“ za Narodnu kuhinju“Imaret“,
22. Transfer ORVI Grada Tuzle '92 –'95 za obilježavanje 16. maja dana Tuzlanskih brigada,
23. Transfer za Turističku zajednicu grada Tuzle za realizaciju posebnih programa Grada Tuzle na unaprijeđenju turističkih sadržaja u gradu Tuzli

dodjeljuju se na osnovu ugovora, a uz prethodni zahtjev odnosno finansijski plan utroška sredstava, koji će sa korisnikom sredstava zaključiti nadležna služba - nosilac sredstava u budžetu.

Ugovorom će se definisati namjena i način korištenja sredstava, te ostale obaveze u pogledu namjenskog korištenja istih.

Član 23.

(Transfer ADS FBiH za obuku državnih službenika i namještenika)

Sredstva utvrđena u budžetu na poziciji Transfer ADS FBiH za obuku državnih službenika i namještenika dodjeljuju se i koriste na osnovu Odluke o osiguranju finansijske održivosti obuke za uposlenike i izabrane zvaničnike u jedinicama lokalne samouprave u FBiH („Sl. novine FBiH, broj: 50/14) i odluke o izdvajanju finansijskih sredstava za sufinansiranje programa stručnog usavršavanja koju donosi Gradonačelnik.

Član 24.

(Transferi za raseljena lica – pomoć povratku i Transferi za povratak – LAP Readmisija)

Sredstva utvrđena u budžetu na pozicijama Transferi za raseljena lica – pomoć povratku i Transferi za povratak – LAP Readmisija dodjeljuju se i koriste na osnovu Ugovora o udruživanju resursa, uslovima i načinu korištenja stanova u okviru Projekta „Integrirani program podrške za reintegraciju povratnika po osnovu sporazuma o readmisiji.

Član 25.

(Transfer za uplatu neuplaćenih poreza i doprinosa radi uvezivanja radnog staža bivšim uposlenicima JP Direkcija za izgradnju Tuzla)

Sredstva utvrđena u Budžetu Grada Tuzle u organizacionoj jedinici Služba za ekonomski razvoj, poduzetništvo i poljoprivredu na poziciji „Transfer za uplatu neuplaćenih poreza i doprinosa radi uvezivanja radnog staža bivšim uposlenicima JP Direkcija za izgradnju Tuzla“, realizovat će se na osnovu pojedinačnih zahtjeva bivših uposlenika JP Direkcija za izgradnju Tuzla, priloženog obračuna poreza i doprinosa i propisanih mjesečnih obrazaca za obračun poreza i doprinosa, potpisanih i ovjerenih od odgovorne osobe u JP Direkcija za izgradnju Tuzla, koje će Služba za ekonomski razvoj, poduzetništvo i poljoprivredu obraditi i posebnim aktom Službi za budžet i finansije predložiti iznos za uplatu po svakom pojedinačnom zahtjevu.

Član 26.

(Transfer za rad - JU „Narodno pozorište“ Tuzla i Transfer za rad - JU Narodna i univerzitetska biblioteka „Derviš Sušić“ Tuzla)

Sredstva utvrđena u budžetu na poziciji Transfer za rad - JU „Narodno pozorište“ Tuzla i Transfer za rad - JU Narodna i univerzitetska biblioteka „Derviš Sušić“ Tuzla, dodjeljuju se u skladu sa zaključenim Ugovorom sa Vladom TK, o regulisanju međusobnih odnosa u vezi sa prenošenjem i preuzimanjem suosnivačkih prava nad navedenim ustanovama.

Član 27.

(Transfer za aktivnu politiku zapošljavanja i Transfer za podršku privatnim preduzećima i poduzetnicima)

Sredstva utvrđena za realizaciju „Transfer za aktivnu politiku zapošljavanja“ i „Transfer za podršku privatnim preduzećima i poduzetnicima“ dodjeljuju se u skladu sa važećim

pravilnikom kojim su utvrđeni uslovi, kriteriji i postupak dodjele novčane podrške privrednim subjektima na području Grada Tuzle, koji donosi Gradonačelnik Grada Tuzle.

Član 28.

(Transfer pojedincima za poticaj poljoprivredne proizvodnje i Transfer privatnim preduzećima i poduzetnicima za poticaj poljoprivredne proizvodnje)

Sredstva utvrđena za realizaciju „Transfer pojedincima za poticaj poljoprivredne proizvodnje“ i „Transfer privatnim poduzećima i poduzetnicima za poticaj poljoprivredne proizvodnje“ dodjeljuju se u skladu sa pravilnikom koji donosi Gradonačelnik Grada Tuzle.

Član 29.

(Tekući transfer - učešće u projektima EU, projektima međunarodnih organizacija i drugih neprofitnih organizacija i Kapitalni transfer - učešće u projektima EU, projektima međunarodnih organizacija i drugih neprofitnih organizacija)

Sredstva utvrđena u budžetu, na poziciji Tekući transfer - učešće u projektima EU, projektima međunarodnih organizacija i drugih neprofitnih organizacija i Kapitalni transfer - učešće u projektima EU, projektima međunarodnih organizacija i drugih neprofitnih organizacija, realizovat će se na osnovu zaključenog ugovora između Grada Tuzle i organizacije kojoj su dodijeljena sredstva.

Član 30.

(Donatorska sredstva)

Rashodi i izdaci po osnovu namjenskih donatorskih sredstava u Budžetu Grada Tuzle planiraju se i izvršavaju u skladu sa ugovorima, sporazumima i drugim aktima potpisanim između Grada Tuzle i donatora sredstava.

Član 31.

(Predfinansiranje projekata Grada Tuzle i JU „TRAG“ Tuzla odobrenih iz fondova EU i drugih međunarodnih organizacija)

Izmirenje obaveza u cilju realizacije projekata Grada Tuzle i JU „TRAG“ Tuzla odobrenih iz fondova EU i drugih međunarodnih organizacija, a koji zahtijevaju predfinansiranje, može se vršiti iz Budžeta Grada Tuzle u skladu sa potpisanim ugovorima, odnosno sporazumima sa donatorom sredstava.

Predfinansiranje projekata predviđenih stavom 1. ovog člana podrazumijeva obavezu Grada da osigura sredstva za realizaciju odobrenih projekata uz obavezu refundiranja isplaćenih troškova od strane donatora u skladu sa preuzetim obavezama.

Odluku o načinu predfinansiranja projekata u cilju realizacije obaveza iz stava 2. ovog člana, na prijedlog budžetskog korisnika, odnosno potrošačke jedinice budžetskog korisnika koji vrši realizaciju odobrenog projekta, donosi Gradonačelnik.

Član 32.

(Transferi za energijsku efikasnosti)

Sredstva utvrđena u Budžetu na poziciji Transferi za energijsku efikasnost u potrošačkoj jedinici Služba za prostorno uređenje i zaštitu okoline realizovat će se u skladu sa Odlukom o

uslovima, kriterijima, postupku i načinu dodjeljivanja transfera za projekte energetske efikasnosti, usvojenom od strane Gradskog vijeća Tuzla.

Član 33.

(Učešće grada u troškovima postupka pribavljanja odobrenja za građenje stambenih objekata boračke populacije)

Sredstva utvrđena u Budžetu na poziciji „Učešće grada u troškovima postupka pribavljanja odobrenja za građenje stambenih objekata boračke populacije“ dodjeljuju se na način propisan Odlukom o subvencioniranju naknade za pogodnost lokacije i troškova u postupku građenja i legalizacije stambenih objekata („Službeni glasnik općine Tuzla“, broj:11/06 i 6/10).

Član 34.

(Subvencioniranje najamnine za korištenje stanova po modelu neprofitno –socijalno stanovanje)

Sredstva utvrđena u Budžetu na poziciji „Subvencioniranje najamnine za korištenje stanova po modelu neprofitno – socijalno stanovanje“ dodjeljuju se na način propisan Odlukom o kriterijima, uslovima i postupku ostvarivanja prava na subvencioniranje najamnine za korištenje stanova po modelu neprofitno – socijalno stanovanje („Službeni glasnik Grada Tuzla“, broj: 10/17).

Sredstva utvrđena u Budžetu na poziciji „Učešće grada u projektima ekonomske održivosti neprofitno – socijalno stanovanje i drugih međunarodnih organizacija“ realizovat će se na osnovu zaključenog sporazuma ili ugovora između Grada Tuzle i međunarodnih organizacija.

Član 35.

(Kapitalni budžet)

Kapitalni budžet Grada Tuzle usvaja Gradsko vijeće Tuzla i isti je sastavni dio Budžeta Grada Tuzle za 2026. godinu.

Član 36.

(Transferi za nabavku i ugradnju toplotnih MRS-a u MZ Šićki Brod, MZ Bukinje i MZ Husino)

Sredstva u Budžetu, u potrošačkoj jedinici Služba za komunalne poslove, izgradnju i poslove mjesnih zajednica, na poziciji Transfer za nabavku i ugradnju toplotnih MRS-a u MZ Šićki Brod, MZ Bukinje i MZ Husino, realizovat će se na osnovu posebne odluke Gradonačelnika, na prijedlog Službe za komunalne poslove, izgradnju i poslove mjesnih zajednica.

Član 37.

(Naknade za rad stručnih komisija)

Sredstva utvrđena u Budžetu za isplatu naknada za rad stručnih komisija za tehnički prijem objekata, isplaćuju se na osnovu Odluke o uslovima i načinu formiranja komisija za tehnički pregled, visine i načina plaćanja troškova za tehnički pregled građevina u postupku izdavanja odobrenja za upotrebu („Službeni glasnik Grad Tuzla“, broj 7/22).

Sredstva utvrđena u Budžetu za rad u stalnim i povremenim komisijama čije osnivanje je predviđeno posebnim propisima, koje imenuju Gradonačelnik, Gradsko vijeće, odnosno rukovodioci gradskih službi, isplaćuju se u skladu sa važećim odlukama.

Sredstva utvrđena u Budžetu za isplatu naknada za rad Zdravstvenog savjeta Grada Tuzle, isplaćuju se na osnovu Odluke o naknadama vijećnicima i članovima radnih tijela Općinskog vijeća („Službeni glasnik općine Tuzla“, broj: 6/97, 10/02, 12/06, 1/08, 1/09 i 11/10).

Član 38.

(Sredstva za rad Gradske izborne komisije)

Sredstva planirana za naknadu članovima Gradske izborne komisije Grada Tuzle se realizuju u skladu sa odredbom člana 2.12. stav (9) Izbornog zakona Bosne i Hercegovine.

Član 39.

(Subvencioniranje troškova uklanjanja arhitektonskih barijera na zajedničkim dijelovima zgrada, Kapitalni transferi za sufinansiranje nužnih popravki na zajedničkim dijelovima i uređajima zgrada i Kapitalni transferi za obnovu fasada u centru grada)

Sredstva utvrđena u Budžetu Grada Tuzle u okviru izdataka Službe za civilnu zaštitu, na pozicijama „Subvencioniranje troškova uklanjanja arhitektonskih barijera na zajedničkim dijelovima zgrada“, „Kapitalni transferi za sufinansiranje nužnih popravki na zajedničkim dijelovima i uređajima zgrada“ i „Kapitalni transferi za obnovu fasada u centru grada“, dodjeljivat će se u skladu sa odlukama koje donosi Gradsko vijeće Tuzla.

Član 40.

(Sredstva za zaštitu i spašavanje)

Sredstva utvrđena u Budžetu Grada Tuzla u okviru izdataka „Službe za civilnu zaštitu - Sredstva za zaštitu i spašavanje“, koristit će se prema Godišnjem planu korištenja sredstava za zaštitu i spašavanje, koji donosi Služba civilne zaštite uz pribavljeno mišljenje Gradskog štaba civilne zaštite, a transakcije po ovom osnovu vršit će se putem namjenskog transakcijskog računa Grada Tuzla, kao podračuna JRT.

Član 41.

(Sredstva za izmirenje naknada za zemljište, izdavanje urbanističke, građevinske i upotrebne dozvole i drugih troškova potrebnih za upis vlasništva na nekretninama)

Sredstva utvrđena u Budžetu Grada Tuzla u okviru izdataka „Službe za civilnu zaštitu - Sredstva za izmirenje naknada za zemljište, izdavanje urbanističke, građevinske i upotrebne dozvole i drugih troškova potrebnih za upis vlasništva na nekretninama“, koristit će se u skladu sa Odlukom o načinu izmirivanja novčanih obaveza u postupku izgradnje individualnih stambenih objekata osobama kojima je trajno onemogućeno korištenje nekretnina za stanovanje usljed prirodne nesreće („Službeni glasnik Grad Tuzla“, broj 2/14).

IV - FINANSIJSKO IZVJEŠTAVANJE

Član 42.

(Izveštaji o izvršavanju Budžeta)

Služba za budžet i finansije dužna je podnositi Gradonačelniku tromjesečni, polugodišnji i devetomjesečni finansijski izvještaj o izvršenju Budžeta 20 dana po isteku obračunskog perioda, a godišnji izvještaj najkasnije u roku šest mjeseci od završetka fiskalne godine.

Služba za budžet i finansije dužna je dostaviti kvartalne izvještaje Ministarstvu finansija TK u roku od 20 dana po isteku obračunskog perioda, a za IV kvartal do 5. marta tekuće godine.

V - ZADUŽIVANJE I UPRAVLJANJE DUGOM

Član 43. (Stvaranje obaveza)

Grad može stvarati obaveze na osnovu zaduživanja ili izdavanja garancija.
O visini zaduživanja i garancijama odlučuje Gradsko vijeće.
Otplata duga Grada predstavlja obavezu Grada.

Član 44. (Svrhe zaduženja)

- Grad Tuzla se može zadužiti u slijedeće svrhe:
- za finansiranje kapitalnih investicija odobrenih od Gradskog vijeća;
 - za plaćanje obaveza na temelju izdatih garancija Grada u slučajevima kada zajmoprimac ne isplati svoje obaveze;
 - za finansiranje budžetskog deficita.

Član 45. (Svrhe izdavanja garancija)

Grad može izdati garanciju samo za finansiranje kapitalnih investicija, pod uslovom da je pravna osoba koja je zajmoprimac sredstava pravna osoba čiji je većinski vlasnik Grad.

VI - RAČUNOVODSTVO I NADZOR BUDŽETA

Član 46. (Računovodstvena načela)

Budžetsko računovodstvo se zasniva na računovodstvenim načelima: tačnosti, istinitosti, pouzdanosti, sveobuhvatnosti, pravovremenosti i pojedinačnom iskazivanju poslovnih događaja, te na međunarodnim računovodstvenim standardima za javni sektor.

Budžetsko računovodstvo se vodi po načelu dvojnog knjigovodstva i na računima kontnog plana budžeta.

Član 47. (Načelo modificiranog nastanka događaja)

Priznavanje prihoda i primitaka, te rashoda i izdataka putem sistema Glavne knjige provodi se po načelu modificiranog nastanka događaja.

Prihodi i primici priznaju se u onom periodu kada su mjerljivi i raspoloživi, odnosno u momentu uplate na JRT Grada Tuzle.

Rashodi i izdaci priznaju se u trenutku nastanka obaveze.

Član 48. (Odgovornost za stvaranje obaveza)

Pomoćnici gradonačelnika za gradske službe za upravu, rukovodioci gradskih stručnih i drugih službi, direktor gradske upravne organizacije, Gradski pravobranilac i direktori javnih ustanova kao budžetskih korisnika odgovorni su za interni nadzor korištenja sredstava dodijeljenih budžetom.

VII - JAVNOST I TRANSPARENTNOST BUDŽETA

Član 49.

(Objavljivanje dokumenata)

U cilju obavještanja javnosti o upravljanju javnim sredstvima u Službenom glasniku Grada Tuzla objavljuju se sljedeći dokumenti: Budžet Grada Tuzle, izmjene i dopune Budžeta Grada Tuzle, Odluka o izvršavanju Budžeta Grada Tuzle, izmjene i dopune Odluke o izvršavanju Budžeta Grada Tuzle, Odluka o prestruktuiranju rashoda Budžeta Grada Tuzla, Odluka o usmjeravanju neplaniranih vlastitih sredstava u Budžet Grada Tuzle, Odluka o korištenju sredstva tekuće rezerve i Odluka o privremenom finansiranju.

Na službenoj internet stranici Grada Tuzla objavljuju se sljedeći dokumenti: Budžet Grada Tuzle, Odluka o izvršavanju Budžeta Grada Tuzle, Dokument okvirnog budžeta Grada Tuzle, periodični, godišnji izvještaji o izvršenju Budžeta Grada Tuzle, Budžetski kalendar Grada Tuzle i drugi dokumenti.

VIII - PRELAZNE I ZAVRŠNE ODREDBE

Član 50.

(Primjena podzakonskih akata)

Na sva pitanja koja nisu regulisana ovom Odlukom, a tiču se načina izrade, donošenja, izvršavanja budžeta, zaduživanja, duga, računovodstva, nadzora i revizije budžeta, primjenjivat će se odredbe važećih propisa.

Član 51.

(Kaznene odredbe)

U slučaju nepoštivanja ove Odluke, primjenjivat će se odredbe člana 102. i 103. Zakona o budžetima u Federaciji Bosne i Hercegovine.

Član 52.

(Stupanje na snagu)

Ova Odluka stupa na snagu danom objavljivanja u „Službenom glasniku Grada Tuzla“, a primjenjivat će se za fiskalnu 2026. godinu.

Bosna i Hercegovina
Federacija Bosne i Hercegovine
Tuzlanski kanton
GRAD TUZLA
GRADSKO VIJEĆE
Broj:01/11-A-20168-2025
Tuzla, 19.12.2025. godine.

PREDSJEDAVAJUĆA VIJEĆA

Ana Pejić, BA prava